

摘藻堂四庫全書薈要

集部

欽定四庫全書薈要

集部  
樂城三集卷二

詳校官助教臣常循



欽定四庫全書薈要卷一萬五千七十

集部

樂城三集卷一

宋 蘇轍 撰

詩七十首

丙戌十月二十三日大雪

 粟滿倉冬藏雪盈尺天意愍無辜歲事了不逆誰

言豐年中遭此大泉厄肉好雖甚精十百非其實田家  
有餘粮靳靳未肯出閤閤但坐視愍愍不得食朝饑願  
充腸三五本自足飽食就茗飲竟亦安用十姦豪得巧

便輕重竊相易鄰邦穀如土胡越兩不及閭民本無賴  
翩然去井邑土著坐受窮忍饑待捐瘠彼哉陶鈞手用  
此狂且愎天且無奈何我亦長太息

畫歎

并引

武宗元比部學吳道子畫佛菩薩鬼神燕肅龍圖學  
王摩詰畫山川水石皆得其彷彿潁川僧舍往往見  
之而里人不甚貴重獨重趙董二生二生雖工而俗  
不識古名畫遺意作畫歎

武燕未遠嗟誰識趙董紛紛枉得名已矣孫陳舊人物  
至今但數漢公卿

夢中反古菖蒲

并引

古詩云石上生菖蒲一寸十二節仙人勸我食令我  
好顏色十一月八日四鼓夢中反之作四韻見一愚  
公在側借觀示之赧然有愧恨之色

石上生菖蒲一寸十二節仙人勸我食再三不忍折一  
人得飽滿餘人皆不悅已矣勿復言人人好顏色

次遲韻復雪

老人怕寒愁早作夜聞飛霰知相虐粟車未到泥復深  
場薪欲盡心驚愕山川滉蕩勢如海孤舟一葉知安泊  
山中故人消息斷欲問有無隔溪壑人言王生好事人  
回船不顧山陰約故侯生來本貧窶妻子至今美藜藿  
曳履長歌解忍饑裹飯往飼今誰託家人來告酒可藟  
洗盞開瓶同一酌

次韻文氏外孫驥以其祖父與可學士書卷還謝

悼學士

西南自是賢俊府衰老思歸謾留許春禾磨麥非平生  
子孫便推我作古賢哉與可詩中傑筆墨餘功散繒楮  
南陽諸謝世有人此邦亦自非其土一時與我俱作客  
白髮蒼顏愧非伍儒術真傳漢太翁風流未減晉諸庾  
兩家尚有往還帖舊集脫遺應可補明窓展卷清淚滴  
恍然似與故人語欲鎖空厨付長康恐君譏我不與取

守歲

歲云莫矣誰能守唯有此心初不移宇宙隨流任爾去  
虛空對面即吾師三盃醉倒聊從俗一點靈明欲語誰  
來日日新無限事歸根一笑彼安知

上元不出

春寒未脫紫貂裘燈火催人夜出遊老厭歌鍾空命酒  
病嫌風露怯登樓擁袍坐睡曾無念結客追歡久已休  
試問西鄰傳法老此時情味似儂不

將築南屋借功田家



先人敝廬寄西南不歸三紀今何堪卜營菟裘閱歲三  
西成黍豆餘石甌借功田家并鋤耒農事未起來不嫌  
併遣浮客從丁男芒屨禿巾短後衫杵聲登登駭閭閻  
期我一月久不厭我方窮困人所諳有求不答心自甘  
一言見許不妄談飲汝信厚心懷慚晨炊暮餉增醯鹽  
歸時不礙田與蠶

丁亥生日

少年即病肺喘作鋸木聲中年復病脾暴下泉流傾困

苦始知道處世百欲輕收功在晚年二疾忽已平來年  
今日中正行七十程老聃本吾師妙語初自明至哉希  
夷微不受外物嬰非三亦非一了了無形形迎隨俱不  
見瞿曇謂無生湛然琉璃內寶月長盈盈

初葺遺老齋二首

髭鬚渾白已經歲腰痛春來日又多一味安閒猶有礙  
却令朝謁擬如何築居定作子孫計好事久遭僧佛呵  
尤愧白家履道宅十年成就飽經過

為留十步南牆竹莫恠門前鳥雀多  
陋巷何妨似顏子  
勢家應未奪蕭何詩書懶惰何曾讀  
氣息調勻不用呵  
多病從來少賓客杜門今復幾人過

謝人惠千葉牡丹

東風催趁百花新不出門庭一老人  
天女要知摩詰病  
銀瓶滿送洛陽春  
可憐最後開千葉  
細數餘芳尚一旬  
更待遊人歸去盡  
試將童冠浴湖濱

移陳州牡丹偶得千葉二本喜作一首

小圃初開清溪岸名花近取宛丘城爭言千葉根難認  
忽發雙葩眼自明謫墮神仙終不俗飛來鸞鳳有餘清  
細鉏瓦礫除荆棘未可令齊衆草生

因舊

并叙

予因卞氏故居改築新宅其廳事陋甚有柴氏聽三  
間求售三百餘萬錢力不能致子遲曰因卞之舊而  
易其尤不可子孫若賢當師公儉予愧其言從之作  
因舊詩

君不見林上鵲冬深始營巢及春巢已成又不見梁上  
燕春深初作窠及夏雛已生我為一區屋三年費經營  
紛紛伐梧楸日厭斤斧聲老竟能幾何何日安餘齡一  
言愧吾兒事忌與力爭青楊易三棟赤榆換雙楹指顧  
行即具構築役亦輕鄼侯念子孫不處高閑闕吾今何  
人斯此則座右銘

初成遺老齋二首

花時懶出伴遊人暑雨深藏養病身新宅丁丁厭斤斧

舊書寂寂卷埃塵久將生事累諸子頓斂浮根付一真  
遺老齋成謀宴坐澹然無語接來賓

舊說潁川宜老人朱櫻斑筍養閒身無心已絕衣冠念  
有眼不遭車馬塵青簡自書遺老傳白鬚仍寫去年真  
齋成謾作笑談主已是蕭然一世賓

蠶麥二首

踈慵自分人嫌我貧病可憐天養人蠶眠已報冬裘具  
麥熟旋供湯麪新擷桑曉出露濡足拾穗暮歸塵滿身

家家辛苦大作社典我千錢追四鄰

三界人家多鮮福一時蠶麥得難兼鉏耰已愧非吾力  
湯火尤驚取不廉貴客爭誇火浣布貧家粗有水精鹽  
薄衫冷麪消長夏捫腹當知百不堪

文氏外孫入村收麥

欲收新麥繼陳穀賴有諸孫替老人三夜陰靈敗場圃  
一竿晴日舞比鄰急炊大餅償饑乏多博村酤勞苦辛  
閉廩歸來真了事賦詩憐汝足精神

李方叔新宅

我年七十無住宅斤斧登登亂朝夕兒孫期我八十年  
宅成可作十年客人壽八十知己難從今未死且磐桓  
不如君家得衆力咄嗟便了三十間李君雖貧足圖史  
旋鑿明窓安淨几閉門但辦作詩章好事時來置樽俎  
我恨年來不出門不見君家棟宇新心安即是身安處  
自揣頭顱莫問人

苦雨

七月朔



蠶婦絲出盎田夫麥入倉斯人薄福德二事未易當忽  
作連日雨坐使秋田荒出門陷塗潦入室崩垣墻覆壓  
先老稚漂淪及牛羊餘粮詎能久歲晚憂糟糠天災非  
妄行人事密有償嗟哉竟未悟自謂予不戕造禍未有  
害無辜輒先傷簞瓢吾何憂作詩熱中腸

殺麥二首

麥幸十分熟雨過三日靈初晴尚未伏半夜卷重陰細  
築場無隙輕推磨有音驚聞諸縣水一睽直千金

其二

雨後麥多病庾中蛾欲飛不辭終日暑幸脫半年饑潦  
水來何暴秋田望已微農夫愚可念此報定誰非

立秋後

伏中苦熱焦皮骨秋後清風濯肺腑肝天地不仁誰念爾  
身心無著偶能安詩書久為消磨日毛褐還須準擬寒  
謾許百年知到否相從一日且磐桓

初築南齋

我老不自量築室盈百間舊屋收半料新材伐他山  
中粟將盡橐中金亦殫涼風八月高扶架起南邊首成  
遺老齋願與客周旋古檜長百尺翠竹森千竿隔城過  
清潁有井皆甘泉平生隱居念眷眷在山川誰言白髮  
年有作竟不然我本師瞿曇所遇無不安諸子知我懷  
勉更求棖掾堂成鋪莞簟無夢但安眠

中秋月望十六終夜如晝

秋氣久已到月明如可期雲生未望夜天借極圓時冷

澈登臨倦衰慵起舞遲  
兔閒長擣藥桂老尚生枝  
運轉何年住清明與物宜  
油然任消長斤斧定何施

釀重陽酒

家人欲釀重陽酒香麴甘泉家自有  
黃花抱蕊有佳思  
金火未調無好手老奴但欲致村酤  
小婢爭言試三斗  
我年七十似童兒逢節歡欣事從厚  
廩粟已空豆方實  
羔豚雖貴魚可取  
病嫌秋雨難為腹  
老嚙饒涎空有口  
折花誰是送酒人  
來客但有鄰家父  
閉門一醉莫問渠

蒼爭不用纓冠救

戲題菊花

春初種菊助槃蔬  
秋晚開花插酒壺  
微物不多分地力  
終年乃爾任人須  
天隨七箸幾時輟  
彭澤樽罍未遽無  
更擬食根花落後  
一依本草太傷渠

九日三首

昔忝衣冠舊  
今從野老遊  
籬根菊初綻  
甕面酒新芻  
不負重陽節  
都無舉世憂  
人生定誰是  
萬事本悠悠

其二

欲就九日飲旋炊三斗醅今朝不一醉坐客有空回白  
髮何須吝黃花恨晚開問知餅未罄相勸盡餘盃

其三

從古重此日今人那得違菊遲知歲閏酒貴念人饑身  
安且自慰家遠不成歸尚憶少年樂驚呼人盡非

十日二首

酒經重九尚殘卮雨送初寒問篋衣養氣安閒真得計

讀書勤苦已知非謾存講說傳家學深謝交遊絕世譏  
築室未成中自笑何如茅屋對柴扉

憂患經懷沃漏卮榮華過眼脫輕衣定心稍覺無來往  
時事誰能問是非祿去身安常自喜宅成囊竭可無譏  
交遊散盡餘親戚酒熟時來一叩扉

初成遺老齋待月軒藏書室三首

老人身世兩相遺綠竹青松自蔽虧已喜形骸今我有  
枉將名字與人知往還但許鄰家父問訊纔通說法師

燕坐蕭然便終日客來不識我為誰

遺老齋

軒前無物但長空孤月忽來東海東  
圓滿定從何處得  
清明許與衆人同  
怜渠生死未能免  
顧我盈虧略已通  
夜久客寒要一飲  
油然細酌意無窮

待月軒

讀書舊破十年功  
老病茫然萬卷空  
插架都將付諸子  
閉關猶得養衰翁  
案頭螢火從乾死  
窓裡飛蠅久未通  
自見老盧真面目  
平生事業有無中

藏書室

久雨



雲低氣尚濁雨細泥益深經旬勢不止晚稼日已侵閒  
居賴田食憂如老農心堆場欲生耳棲畝將陸沉常賦  
雖半釋雜科起相尋凶年每多暴此憂及山林號呼天  
不聞有言不如喑願見雲解脫秋陽破羣陰

方築西軒穿地得恠石

卞氏平日本富家庭中恠石蹲踞慶子孫分散不復惜  
排棄坑谷埋泥沙一株躍出隨畚鍤知我開軒方種花  
頽然遠嶺垂澗壑豁然洞穴通烟霞十夫徙置幸不遠

軒前桐柏陰交加我家舊隱久不到小池尺水三流槎  
少年旋遶看不足時呼野老來煎茶老人得此且自慰  
更訪餘石探幽遐

或言卞氏舊石尚多  
但未知沉淪處爾

肺病

肺病比不作屈信三十年今年胡為爾呀然上衝咽寒  
冰未易溫死灰誰使然醫言無庸恠此理環無端少年  
少戕敗今日存精堅假年復除害非人豈非天

送遜監淮西酒并示諸任二首

疇昔南遷海上雷艱難唯與汝同來再從龍尉茅叢底  
旋卜雲橋荔子堆相與閉門尋舊學誰言復出理官醅  
乘田委吏先師事莫學陶翁到即回

淮西留滯昔經年唯有諸任時往還炊黍留賓不嫌陋  
借書度日免長閒歸來潁水無人問夢遶伊家古檜間  
二老舊遊唯我在後生誰復識蒼顏

遵聖師中二老人  
雖鄉人今無識之

者矣

風雪

閏十月  
十一日

冬溫未宜人風雪中夜止疾雷畧吾窓輕冰入吾被病  
去適三日驚起存一氣心安氣亦安二物本非二皎然  
一寸燈下燭九泉底物來無不應物去未嘗昧恨我俗  
緣深撓此古佛智醫來視六脉六脉非昔比

醫適有此言

讀傳燈錄示諸子

大鼎知難一手扛此心已自十年降舊存古鏡磨無力  
近喜三更月到窓早歲文章真自累一生憂患信難雙  
從今父子俱清淨共說無生或似龐

夢中詠西湖

誰鑿西湖十里中，扁舟載酒颺輕風。  
草木蕃滋百事足，寒暄淡薄四時同。  
東鄰適與吾廬便，西岸遙將岳麓通。  
閒遊草草無人識，竹杖藤鞋一老翁。

前四句夢中得後四句起而足之

買炭

苦寒搜病骨，絲纊莫能禦。  
斫薪燎枯竹，勃鬱烟充宇。  
西山古松櫟，材大招斤斧。  
根槎委溪谷，龍伏熊虎踞。  
挑抉靡遺餘，陶穴付一炬。  
積火變深黥，牙角猶憤怒。  
老翁

闕

破氈正晝出無屨百錢不滿籃一坐幸至莫御爐歲增  
貢圓直中常度閤閤不敢售根節姑付汝升平百年後  
地力已難富知夸不知嗇俛首欲誰訴百物今盡然豈  
惟一炭故我老或不及預為子孫懼

欲雪

今年麥中熟麪餌不充口老農畏冬旱薄雪未覆畝驕  
陽引狂風三白知應否久晴車牛通薪炭家家有唯有  
口腹憂此病誰能救達官例謀身一醉日自富尚應天

愍人雲族朝來厚飛花得盈尺一麥可平取

那吒

北方天王有狂子只知拜佛不拜父佛知其愚難教語  
寶塔令父左手舉兒來見佛頭輒俯且與拜父略相似  
佛如優曇難值遇見者聞道出生死嗟爾何為獨如此  
業果已定磨不去佛滅到今千萬祀只在江湖挽船處  
示諸子

老去惟堪一味閒坐令諸子了生緣般柴運水皆行道

挾策讀書那廢田兄弟躬耕真盡力鄉隣不慣枉稱賢  
裕人約已吾家世到此相承累百年

范五德孺近語遜  
聞君家兄弟善治

田蓋取其  
不盡利耳

戊子正旦

百歲行來已七分筋骸轉覺不如人法傳心地初投種  
雨過花開不待春識路一時如有得到家諸事本非新  
舊陳芻狗今無用付與時人藉兩輪

題舊鍾馗

并引



癸丑歲予為興德軍掌書記是歲大旱除日府中饋  
畫鍾馗行雪中狀甚怪後三十六年檢篋中舊畫得  
之戲作此篇

濟南書記今白須歲節鍾馗舊綠襦舉手托天欣見雪  
破鞋踏凍可怜渠滔滔時輩今黃壤六六年華屬老夫  
兒女未容翁便去銀瓶隔夜浸屠酥

七十吟

年來霜雪上人頭我爾相將七十秋欲去天公未遣去

久留弊宅恐難留六窓漸暗猶牽物一點微明更著油  
近聽老盧親下種滿田宿草費鉏耰

久旱府中取虎頭骨投邢山潭水得雨戲作

邢山潭中黑色龍經年懶卧泥沙中嵩陽山中白額虎  
何年一箭肉為土龍雖生虎雖死天然猛氣略相似生  
不益人死何負虎頭枯骨金石堅投骨潭中潭水旋龍  
知虎猛心已愧虎知龍懶自增氣山前一戰風雨交父  
老曉起看麥苗君不見岐山死諸葛真能奔走生仲達

生日

扶杖今年見國人懸弧早歲憶茲晨佛身三世歸依地  
隣寺百僧清淨因遽子知非慙已晚白公起定惜餘春  
舞雩一濯平湖水鄉黨驚呼白髮新

是日南堂供三世佛西寺齋僧百人

將拆舊屋權住西廊

平生未有三間屋今歲初成百步廊欲趁閒年就新宅  
不辭暑月卧斜陽脩篁已謝前人種甘井何妨衆口嘗  
奔走從來成底事安居到處漫為鄉

種花二首

築室力已盡種花功尚疎  
山丹得春雨艷色照庭除  
末品何曾數羣芳自不如今秋  
接千葉試取落人餘

其二

築室少閒地種花能幾畦  
松筠舊滿眼桃李漸成蹊  
無計通湖水長思種藕泥  
幽懷終不愜拄杖出城西

同遲賦千葉牡丹

未換中庭三尺土漫種數叢千葉花

園工言近家糞土  
糞土多虫故不宜

花須換黃二  
三尺花乃茂  
造物不違遺老意  
一枝頗似洛人家  
名園

不放尋芳客  
陋巷希聞載酒車  
未忍畫瓶脩佛供  
清樽酌盡試山茶

同遲賦春晚

池塘春旱欲生塵  
一雨能令草木新  
脾病不嫌櫻笋薄  
廩空偏喜麥禾勻  
白須照水湖光淨  
淥酒留人鳥哢頻  
但恐少年嫌老醜  
眼前無復一時人

春無雷

經冬無雪麥不死秋雨過多深入土人言來歲定無麥  
農父掉頭笑不許清明雨足麥欣欣旋救奴婢脩破困  
大麥過期當半熟小麥未晚猶十分東家西舍發陳積  
十錢一餅猶難得向來天公不為人市人半是溝中瘠  
前望麥熟一月期老稚相勸聊忍饑誰令伏枕作寒熱  
囊中無錢誰肯醫天公愛人何所吝一春雨作雷不震  
雷聲一起百妖除病人起舞不須扶

聞卞氏舊有恠石藏宅中問其遺孫指一廢井云

盡在是矣井在室中床下尚未能取先作

昔人遊宦久江湖恠石嵌空駭里閭一井深藏緣底事  
百年不出待潛夫棄捐泥土性仍在睥睨林亭氣漸蘇  
微物廢興猶有定此生窮達謾長吁

仲夏始雷

陽氣溟濛九地來經春涉夏始聞雷麥禾此去或可望  
桃李向來誰使開號令速遭人共恠陰陽顛倒物應猜  
一聲震蕩雖驚耳遍地妖氛未易回

八璽

秦人一璽十五城百二十城當八璽元日臨軒組綬新  
君臣相顧無窮喜九鼎崢嶸夏禹餘八璽錯落古所無  
古人鄙陋今人笑父老不慣空驚呼

讀舊詩

早歲吟哦已有詩年來七十才全衰開編一笑恍如夢  
閉目徐思定是誰敵手一時無復在賞音他日更難期  
老人不用多言語一點空明萬法師



五月園夫獻紅菊二絕句

黃花九月傲清霜百草滿園無此香  
紅紫無端盜名字  
試尋本草細商量

南陽白菊有奇功潭上居人多老翁  
葉似皤蒿莖似棘  
未宜放入酒盃中

夏至後得雨

天惟不窮人旱甚雨輒至麥乾春澤匝禾稿夏雷墜  
一年失二雨廩實真不繼我窮本人窮得飽天所畀奪祿

十五年有田潁川涖躬耕力不足分穫中自愧餘功治  
室廬棄積霑狗彘久養無用身未識彼天意

遲往泉店殺麥

罷民不耕穫豈利有攸往古人為我言許此亦無妄一  
冬免鉏犁二麥盈壅盎火老金尚伏雨過築塲壤隣家  
助伯亞蒼耳割榛莽朝陽得終日經歲可無恙老夫終  
病慵長子幸可仗劬勞慎勿厭麤餌家共享秋田雨初  
足已作豐熟想歸來報好音相對開臍釀

夏夜對月

大火直南方萬物委爐炭微雲吐涼月中夜初一浣老  
人氣如縷枕簟亦流汗披衣遶中庭星斗曙相祭鳴蜩  
思清露抱葉一長歎栖鵲亦未安遶樹再三轉我生仰  
田食候雨占雲漢朽然未可期無食終誰怨褰帷竟不  
寐夜氣淨如練愛之不忍觸惟恐朝來散

千葉白蓮花

蓮花生淤泥淨色比天女臨池見千葉謫墮問何故空

明世無匹銀瓶送佛所清泉養芳潔為我三日住  
驚然落寶床應返梵天去

追和張公安道贈別絕句

并引

予年十八與兄子瞻東遊京師是時張公安道守成  
都一見以國士相許自爾遂結忘年之契公晚事裕  
陵君臣之義初不淺也既而與用事者異議拂衣而  
出初守宛丘次守南都予亦以議論不合連從公遊  
元豐初子瞻以詩獲罪竄居黃州予謫監筠州酒稅

公淒然不樂酌酒相命手寫一詩為別曰可憐萍梗  
飄浮客自嘆匏瓜老病身從此空齋掛塵榻不知重  
掃待何人後七年蒙恩召還復見公南都自是又八  
年而有升沉之歎時公薨已數年矣及自龍川還潁  
川姪過出子瞻遺墨中有公所贈章覽之泣下不能  
止乃追和之

少年便識成都尹中歲仍為幕下賓待我江西徐孺子  
一生知己有斯人

樂城三集卷一

欽定四庫全書薈要卷一萬五千七十一

集部

樂城三集卷二

宋 蘇轍 撰

詩七十一首

遺老齋絕句十二首

杜門本畏人門開自無客孤坐忽三年心空無一物

其二

衆音入我耳諸色過吾目聞見長歷然靈源不受觸

其三

茲心淨無垢尚愛南齋竹當暑得清風冷然若新沐

其四

老檜真百尺疎竹疑千畝紛紛霰雪中見此歲寒友

其五

栽竹種松檜十年未成陰昔人定知我為我養南林

其六

久無叩門聲剥啄問何故田中有人至昨夜盈尺雨

其七



我居近西城城枕湖一曲不到平湖上何物禁吾足

其八

北臨鳳凰臺鳳去臺亦圯萋萋脩竹林喈喈何日至

其九

昔我過嵩麓雲移見諸峰重遊未有日想像曠靈中

其十

避事已謝客養性不看書書中多感遇掩卷輒長吁

其十一

人言里中舊獨有陳太丘文若命世人惜哉憂人憂

其十二

巢由老箕山遁世聊可耳臨流愧堯舜又甚陳仲子

移花

八月十六日

種花南堂南堂毀花亦瘁理畦西軒西花好未忍棄慙  
勲拔陳草秋雨流入地移根傳生土指日春風至花來  
本陳洛盈尺不為異力求千葉枝更與一溉水人功誠  
已盡天巧行可致我老百不為愛此養花智

服栗

老去日添腰脚病  
山翁服栗舊傳方  
經霜斧刃全金氣  
插手丹田借火光  
入口鏘鳴初未熟  
低頭咀噍不容忙  
客來為說晨興晚  
三噉徐收白玉漿

白菊

白菊長先黃菊開  
年年九日泛新醅  
猶存古歷標花候  
不柰時人信手栽  
得勢從教盈九畹  
俛眉聊復引三盃  
愈風明目須真物  
能使神農為爾回

九日家釀未熟

平生不喜飲九日猶一酌今年失家釀節到真寂寞床  
頭瀉餘樽畦菊吐微萼洗盞對妻孥肴蔬隨厚薄興來  
欲徑醉量盡還自却傍人嘆身健省已知脾弱尚有姑  
射人自守常綽約養生要慈儉已老慚矍鑠燕居漸忘  
我杜門奚不樂風麴日已乾濁醪可徐作

南齋獨坐

獨坐南齋久忘家似出家香烟穠作穗茶面結成花細

竹才通徑長松初有槎往還真斷絕一一數歸鴉

西成

野老端相慶西成僅十分寒來多釀酒客過預留饋近  
事姑求飽遠憂要浪聞一壺真有理終日得醺醺

藏菜

爨清葵芥充朝饕歲晚風霜斷菜根百日園枯未易過  
一家口衆復何言多排饔飩先憂盡旋設盤盂未覺煩  
早晚春風到南圃侵凌雪色有新萱

示諸子

諸子才不惡功名舊有言窮愁念父母心力盡田園志  
在要須命身閒且養源遊魚脫淵水何處有飛翻

示諸孫

少年真力學玄月閉書帷老去渾無賴心空自不知交  
遊誰識面文字略存詩笑向諸孫說疎慵非汝師

十一月一日作

晝短圖書看不了夜長鼓角睡難堪老懷騷屑誰為伴

心地空虛成妄談酒少不妨隣叟共病多賴有衲僧諳  
覺師識病  
善用藥積陰深厚陽初復一點靈光勤自參

冬至日

陰陽升降自相催齒髮誰教老不回猶有髻珠常照物  
坐看心火冷成灰酥煎隴坂經年在柑摘吳江半月來  
官冷無因得官酒老妻微笑潑新醅

除日

年年最後飲屠酥不覺年來七十餘十二春秋新罷講

五千道德適親書木經霜雪根無蠹船出風波載本虛  
自恠多年客箕穎每因吾黨賦歸歟

腦中三雪

一腦不虛度三雪白相因暗添池上凌稍壓夢中塵餘  
潤想猶在苦寒將及春慙慙欲盡酒扶養病衰人

伐雙穀

臘月二十  
七日作

芳蘭非不嘉當門自宜鋤矧此惡木陰久妨長者車僕  
夫礪尋斧告我日方除久持不忍意柯條益扶疎植根



雖云固伐去曾須臾我塗雖不寬出入自有餘開門聽  
還往并納賢與愚荒穢一朝盡來者皆虛徐

上元夜适勸至西禪觀燈

三年不踏門前路今夜仍看屋裡燈照佛有餘長自照  
澄心無法便成澄追歡狂客去忘返入定孤僧喚不應  
更到西禪何所問隔牆魚鼓正登登

程八信孺表弟剖符單父相遇潁川歸鄉待闕作  
長句贈別

我生猶及見大門弟兄中外十七人兩家門戶甲鄉黨  
正如潁川數孫陳嗄嗄鳴鴈略雲漢風吹散落天一垠  
歸來勉強整毛羽飲水啄粒傷離羣東西隔絕不敢恨  
死生相失長悲辛蕭蕭華髮對妻子往往老淚流衣巾  
仲叔已盡季亦老雙星孤月耿獨存老夫閉門不敢出  
喜君三度乘朱輪今春剖符地尤勝不齊自古留芳塵  
回車訪我念衰老挽衣把臂才逡巡君行到官我未死  
杖藜便是不速賓一尊酌我當有問此國豈有賢於君

兄弟中惟僕與  
程八程九在耳

### 種松

城郭人家歲寒木檜柏森森映華屋青松介僻不入城  
野性特嫌塵土辱中庭冉冉盈尺苗條榦雖短風霜足  
培根不用糞壤厚插竹預防鷄犬觸他年期汝三丈高  
獨立仙翁毛髮綠老翁自分不及見子孫見汝知遺直  
二月望日雪二絕

玄冥留雪惱中春損麥傷花病老人已典布裘捐衲襪

朝來酒盡乞比隣

老翁衰病不憂花百口唯須麥養家聞道田中猶要雪  
兼收凝白試山茶

遜自淮康酒官歸觀逾旬而歸送行二絕句

官期未滿許寧親平日宦遊無此恩雨遍公田及私畝  
學書兼得問筠孫

乘田委吏責無多舊學年來竟若何開卷新詩可人意  
到官無復廢吟哦

去年秋扇二絕句

篋中秋扇委塵埃  
春晚炎風拂面來  
舊物不辭為世用  
故人相見莫心猜

扇中秦女舊乘鸞  
拂去浮塵色尚鮮  
未盡炎風早歸去  
不堪秋後乞哀憐

讀舊詩

老人詩思如枯泉  
輾轡不下壑  
盎乾舊詩展卷驚  
三年粲然佳句疑  
昔賢老來百事不如前  
藜羹稻飯嗟獨便

飽食餘暇盡日眠安用琢句愁心肝

堂成不施丹雘唯紙窓水屏蕭然如野人之居偶

作

高棟虛窓五月涼客來掃地旋焚香白雲低繞明月觀  
漲海東流清暑堂病久渴心思沆瀣夢回餘念屬瀟湘  
老人夫婦修行久此處從今是道場

南齋竹三絕

幽居一室少塵緣妻子相看意自閒行到南窓脩竹下

恍然如見舊溪山

舊山脩竹半塵埃誰種南林待我來  
新筍出牆秋雨足閉門長與護蒼苔

里中佳客舊孫陳我自疎慵不見人  
目倦細書長掩卷心遊法界四無隣

中秋新堂看月戲作

年年看月茅簷下今歲堂成月正圓  
自笑吾人強分別不應此月倍嬋娟  
虛窓每怯高風度碧瓦頻驚急雨懸

七十老翁渾未慣安居始覺貴公賢

聞都下諸家新建  
甲第壯麗頃所未

有

### 午寢

食飽年來幸有秋倒床清夢百無憂  
忍饑終愧首陽客睡足何須雲夢州  
冰酒黃封生不喜春芽紫筍向誰求  
平生尚有書魔在一卷還堪作枕頭

### 九日陰雨不止病中把酒示諸子三首

旱久翻成霧雨災老人腹疾強啣盃  
官醅菜豆適初熟



籬菊黃花終未開兒女共憐佳節過鷄豚恐有故人來  
衰年此會真餘幾薄酒無多不用推

其二

九日不能飲呦呦覺胃寒妻孥勸把盞萸菊正堆槃懶  
極久成病年高終鮮歡道人嫌服藥心息自相安

其三

庭菊兼黃白村醪雜聖賢微吟還自喜不飲信徒然陶  
亮貧非病孟嘉醒亦顛相看莫相笑與爾各當年

落葉滿長安分題

有客倦長安秋風正颯然九衢飛亂葉八水凝寒烟搖  
落南山見淒涼陋巷偏名園失綠暗清渭泛紅鮮衣信  
催煩杵狼烽報極邊長江苦吟處日暮想橫鞭

臘月九日雪三絕句

天公留雪待嘉平飛霰來時曉未明病士擁衾催煖酒  
閉門不聽掃瑤瓊

去年家釀不須沽秫米今年絕市無雪沒前山薇蕨盡

誰憐無語獨攜鉏

腸中得雪春宜麥  
甕裡無糟寒惱人  
未暇樽罍伴佳客  
先將麤餌許比鄰

己丑除日二首

閱遍時人身亦老  
卷殘舊曆意茫然  
髭鬚白盡無添處  
甲子重來又十年  
酒儉不容時一醉  
堂成且喜夜安眠  
春秋似是平生事  
屋壁深藏付後賢

橘紅安穩近誰傳

予舊有腹疾或教服  
橘皮煎丸經月良愈

鬚雪蕭騷久已

然梅柳任教脩故事蚕絲聊與祝新年

鄉人以餽蜜和麴象梅枝柳葉

又以肉雜物為羹名之曰蚕絲

敲門賀客辭多病守歲諸孫聽不眠粗

有官酤供夜飲一瓶渾濁且稱賢

同外孫文九新春五絕句

佳人旋貼釵頭勝園父初挑雪底芹  
欲得春來怕春晚  
春來會似出山雲

甕中臘脚長憂凍戶外春風那得知  
酒熟定應花未動  
舉瓢先對柳千絲

菊葉萱芽初出土凍齏冷麪欲宜人老人脾病難隨汝  
洗釜磨刀待晚春

築室恨除千本竹及春先補百株花隔年預與園夫約  
春雨晴時問汝家

雪覆西山三頃麥一犁春雨祝天工麥秋幸與人同飽  
昔日黃門今老農

上元前雪三絕句

牕中平地雪盈尺嵩隗山田麥尚乾不管上元燈火夜

飛花處處作春寒

閉門不問門前事  
燈火薰天自不知  
聞道朝來雪又下  
老人今歲未應饑

天公似管人間事  
近事傳聞半是非  
但使麥田饒雨雪  
饑人得飽未相違

上元雪

上元燈火家家辦  
遍地瓊瑤夜夜深  
衲被蒙頭真老病  
紗籠照佛本無心  
床頭酒甕恰三斗  
山下麥田真百金

乞我終年醉且飽端能擁鼻作微吟

春陰

春後誰令百日陰雨淫風橫兩相侵天公未有惜花意  
野老空成念麥心共怪鵲筠亦黃落終憐老檜獨蕭森  
過中不克陽安在夏旱前知未易禁

是春所在竹林皆黃落頃所未見

庭中種花

空庭一無有初種六株花青桐綠楊柳相映成田家春  
雨散膏油朝暾發萌芽造物知我心初來盡枯槎開花

已可貴結子成益佳百事盡如此一生復何嗟我生本  
窮陋中年旅朝衙失脚墮南海生還夢荒遐築室雖不  
多於我則已奢松筠伴衰老已矣無復加

曾郎元矩見過逾月聽其言久而不厭追感平昔  
為賦詩

胄子相從得佳婿

遲初於太學識元矩因有姻議

掖垣同直喜良朋交

情不意隔生死世事休論有廢興宿草芊綿淚入土故  
琴牢落恨填膺遠來似覺清談勝試問傳家今幾燈



閉門

閉門潁昌市不識潁昌人身閒未易過閒久生暗塵我  
念作閒計欲與黃卷親少年病書史未老目先昏掩卷  
默無言閉目中自存心光定中發廓然四無鄰不知心  
已空不見外物紛瞿曇昔嘗云吐哉不肯信一見勿復  
失愈久當愈真

林筍復生

春寒侵竹竹憔悴父老皆云未嘗記偶然雷雨一尺深

知為南園衆君子從地湧出長如人一一便有凌雲氣  
吾家老圃倦栽接但以歲寒相嫵媚一朝紛紛看黃落  
嵇阮相過無醉地陰陽往復知有數已病還瘳非即死  
呼童徑語隣舍翁種竹未改當年意姚黃左紫終誤人  
千葉重臺定何事

老柏

柏根可合抱柏身長百尺我年類汝老我心同汝直我  
貧初無居愛汝買此宅索居懷舊友開軒得三益風中

有餘勁雪後不改色我貧不栽花遶屋多種竹全家謬  
聞道舉目無他物晨興輒相對知我有慚德

糞麥

春寒風雨淫蠶麥止半熟耕桑未嘗親有獲敢求足隣  
田老翁嫗囊空庾無粟機張久乏緯食晏惟薄粥熟耕  
種未下屢禱雲不族私憂止寒餓王事念鞭朴為農良  
未易為吏畏簡牘閉門差似可恐饑有餘福

喜雨

夏田已報七分熟秋稼方憂十日乾好雨徐來不倉卒  
天公似欲救艱難魃張鷹犬無遺力社近鷄豚趁早寒  
老病隨人幸一飽爐香無語只長歎

題東坡遺墨卷後

少年喜為文兄弟俱有名世人不妄言知我不如兄篇  
章散人間墮地皆瓊英凜然自一家豈與餘人爭多難  
晚流落歸來分死生晨光迫殘月回顧失長庚展卷得  
遺草流涕濕冠纓斯文久衰弊涇流自為清科斗藏壁

中見者空嘆驚廢興自有時詩書付西京

洗竹

寒甚南軒竹半黃晚抽旱筍雜榛荒不嫌毒手千竿盡  
稍放清風八月涼短簞只堪除糞壤新萌會看伏牛羊  
扶持造化須人力早聽人言布麥糠

寄張芸叟

并引

張芸叟侍郎編樂府詩相示繼以書問手戰之故懇  
懇有見憐衰病意作小詩謝之

老矣張芸叟親編樂府詞才高君未覺手戰我先衰點  
黥舊無對吟哦今與誰十年酬唱絕歡喜得新詩


樂城三集卷二

謹案三集卷一第十二頁後五行屈信三十年按  
信疑指字之訛

第十四頁後四行豈惟一炭故刊本惟訛為據宋  
文鑑改







總校官庶吉士臣張能照  
校對官編修臣閔懌大  
騰錄監生臣任益春

欽定四庫全書薈要

集部

樂城三集卷六

三至

詳校官助教臣常循



欽定四庫全書薈要卷一萬五千七十二集部

樂城三集卷三

宋 蘇轍 撰

詩七十首

兩中秋絕句二首

并叙

樂城三集

予謫居龍川己卯歲閏九月重九南方初有涼氣

予置酒招同巷黃氏老與之對酌作四絕句其卒章  
曰尉他城下兩重陽白酒黃雞意自長卯飲下床虛  
已散老年不似少年忙明年蒙恩北歸寓居潁川庚

寅歲閏八月遇兩中秋賦兩絕句以繼前作俛仰十  
有二年時正苦腹疾秋思索然老病日加亦理勢然  
矣

潁川城下兩中秋金氣初凝火尚流脾病家人不教飲  
官厨好酒亦難求

兩逢重九尉他城蜚叟相從倒酒瓶十二年來均寂寞  
此心南北兩冥冥

贈德仲

我昔見子京邑時鬚髮如漆無一絲今年相見潁昌市  
霜雪滿面知為誰故人分散隔生死子然惟以影自隨  
憐子肝心如鉄石昔所謂可今不移世間取舍竟誰是  
惟有古佛終難欺嗟哉我自不知子意子清淨持律師  
忽然微笑不言語袖中錦綉開新詩可憐相識二十載  
終日對面初不知蚌含明珠不肯吐暗行沙底藏光輝  
蚌為身計良可耳旁人不悟寧非嗤

閏八月二十五日菊有黃花園中粲然奪目九日

不憂無菊而憂無酒戲作

年年九日憂無菊今歲床空未有糟  
世事何嘗似人意  
天公端解惱吾曹  
金龜解去瓶應滿  
玉液傾殘氣尚豪  
門外白衣還到否  
今時好事恐難遭

九日三首

瓢尊空挂壁九日若為歡  
白髮逃無計黃花開已闌  
酒慳慙對客風起任飄冠  
賴有陶翁伴貧居得自寬

其二

解衣換村酒酒薄不須嫌節到勿空過盃行且強拈得  
閒身尚健適意事難兼醉卧南窓日誰知酸與甜

其三

幼子淮西客雙壺思老人遠來經顛淡細酌喜清醇飲  
罷遙憐汝歸來早及春南齋昔未有餘似舊時貧

戲題三絕

懊惱嘉榮白髮年逢人依舊唱陽關渭城朝雨今誰聽  
研鼓跳踉一破顏

謝傅淒涼已老年胡琴羌笛怨遺賢使君於此雖不俗  
挽斷髭鬚誰見憐

遍地花鈿歎百年蒼顏白髮意淒然回頭笑指此郎子  
破賊將來知有天

木冰

老病不眠知夜寒晨興薄冰滿庭前枯榆老柳變精妍  
細稍如苗麓如椽風敲碎玉落紛然冰裹櫺葉誰雕鐫  
鄰家父老呼東垣欲沽官酒囊無錢我有強起試一觀



樹稼不見今十年

夜坐

少年讀書目力耗老怯燈光睡常早一陽來復夜正長  
城上鼓聲寒考考老僧勸我習禪定跏趺正坐推不倒  
一心無著徐自靜六塵消盡何曾掃湛然已似須陀洹  
久爾不負瞿曇老回看塵勞但微笑欲度羣迷先自了  
平生誤與道士遊妄意交梨求火棗知有毗盧一逕通  
信脚直前無別巧

老史

口食陽翟粟身衣陽穀絲二物不相卽飽暖常不時老  
史知我窮一歲一奔馳方暑勸脂車苦寒伺來歸嗟我  
垂老年未免憂寒饑老史甚忠信但恨性重遲事我三  
十年閔閔不相離我門了無求辛苦終不辭平生金石  
交至此或已攜老史未易得試復養其兒

臘雪次遲韵

冬儲久未辦佳雪為人留穀豆入高廩薪蒸轉十輶紛

紛了歲事閔閔念農疇家有二頃田一頃種米薊風聲  
夜中變飛霰曉未休粗畢今歲寒復免來年憂天公知  
人心未禱得所求傾瓢有遺酌起和田中謳

小雪

小雪僅能消膈熱苦寒偏解惱衰翁年豐誰使百物貴  
心淨要令萬事空老去禪功深自覺生來滯運與人同  
閒中未斷生靈念清夜焚香處處通

土牛

天地非不仁萬物自芻狗土牛適成象逡巡見屠剖田  
家挽雙角歸理縲絲釜生無負重力死作初耕候碎身  
本不辭及物稍無負君看劉表牛豈脫曹公手

除夜二首

年年賦除夜一賦一衰殘家有三斗釀春餘半月寒鷄  
豚不改舊隣里自相歡元日應無客蕭然不著冠

其二

七十三年客相從尚幾年西方他日事東魯一經傳漸

解平生縛初安半夜禪紛紛爭奪際何意此心全

遺老齋南一拍雙榦昔歲坐堂上僅可見也今出  
屋已尺餘偶賦

翠柏擢雙榦冉冉出屋危柏長雖云喜我老亦可知苦  
寒不改色烈風終自持門閒斷來客相對不相欺

正月十六日

上元已過欲收燈城郭遊人一倍增陌上紅塵霏似霧  
雲間明月冷如冰誰言世上驅馳客老作庵中寂定僧

漏水半消燈火冷長空無滓色澄澄

七十三歲作

一生有志恨無才久爾蕭蕭白髮催力學當年真自信  
初心到此未應回舊人化去渾無幾新障重生撥不開  
七十三年還住否獲麟後事轉難裁

春旱彌月郡人取水邢山二月五日水入城而雨  
春旱時聞孽火然邢山龍老不安眠麥生三寸未覆壠  
雨過一犁初及泉深愧貧民饑欲死可憐肉食坐稱賢

南齋遺老知尤幸湯餅黃蘗又一年

龍川道士

廖有象

昔我遷龍川不見平生人傾囊買破屋風雨庇病身頗  
然一道士野鶴墮鷄羣飛鳴閭巷中稍與季子親刺口  
問生事褰裳觀運斤俯仰忽三年愈久意愈真送我出  
重嶺長揖清江濱方營王皇宮棟宇期一新成功十年  
後脫身走中原見公心自足徒步非我勤我歸客箕頽  
晝日長掩關僕夫忽告我門有萬里賓問其所從來笑

指南天雲心知故人到驚喜不食言我老益不堪惟有  
二頃田年年種麥禾僅能免饑寒君來亦何為助我耕  
且耘嗟古或有是今世非所聞

重贈

出家無復家視身等雲浮東西隨風行忽然遍九州君  
居龍川城築室星一周屋瓦如翬飛象設具冕旒弟子  
五六人門徒散林丘本為百年計自可一世留胡為不  
復顧脫去如弊裘萬里一藤杖來從故人遊故人病老



翁輕重恐未酬疑君了心法萬物皆浮漚去彼非有嫌  
來此亦無求是心摩尼珠不受篋笥收故人感君意一  
言還信不遠行不為此浪走非良謀

食櫻笋二首

一旱經春草木焦朱櫻結子獨盈條槃中宛轉明珠滑  
舌上逡巡絳雪消仰囁佳人露猶濕偷銜啼鳥語尤嬌  
南方荔子爭先後羞見炎風六月燒

林竹抽萌不忍挑誰家盈束伴晨樵籜龍似欲號無罪

食客安知惜後凋不願鹽梅調鼎味姑從律呂應簫韶  
林間老死雖無用一試冬深雪到腰

西軒畫枯木恠石

西軒素屏開白雲婆娑老桂依霜輪顧免出走蟾蜍奔  
河漢卷海機石蹲牽牛自載倚桂根清風颯然吹四隣  
東坡妙思傳子孫作詩髣髴追前人筆墨墮地稱奇珍  
閉藏不聽落泥塵老人讀書眼病昏一看落筆生精神

悟老住慧林

能公住嶺南正觀呼不起忠公客中禁朝恩不為累道人無淨穢所遇忘嗔喜悟公清淨人心厭紛華地慧林虛法席去有遲遲意投身淤泥中佛法何處是引身山林間過患差無幾力小難自欺心安似無愧悟世常失人違心輒喪已徐行勿與較乘流得坎止君看淨因揩志以直自遂殺身竟何益犯難豈為智去住本由天母求亦無避相期明且哲大雅亦如此

蠶麥

春旱麥半熟蠶收僅十分不憂無餅餌已幸有襦裙造  
化真憐汝耕桑不謾勤經過話關陝貧病不堪聞

北堂

吾廬雖不華粗有南北堂通廊開十窓爽氣來四方風  
長日氣遠六月有餘涼兒女避不居留此奉爺娘爺娘  
髮如絲不耐寒暑傷單衣焦葛輕軟飯菰芥香無客恣  
卧起有客羅壺觴今年得風痺摩膏沃椒湯念終捨此  
去故山松柏蒼此地亦何為歲時但蒸嘗

秋稼

雨晴秋稼如雲屯  
豆沒雞兔禾没人  
老農歡笑語行路  
十年儉薄無今晨  
無風無雨更一月  
藜羹黍飯供四鄰  
天公似許百姓足  
人事未可一二論  
窮邊逃卒到處滿  
燒場入室才逡巡  
縣符星火雜鞭箠  
解衣乞與猶怒嗔  
我願人心似天意  
愛惜老弱憐孤貧  
古來堯舜知有否  
詩書到此皆空文

七夕

火流知節換秋到喜身安林鵲真安往河橋晚未完得  
閒心不厭求巧老應難送酒誰知我瓢樽昨暮乾

食雞頭

風開芡觜鉄為鬚斧斫沙磨旋付厨細嚼兼收上池水  
徐嚙還成滄海珠佳客滿堂須一斗閒居賴我近平湖  
多年不到會靈沼氣味宛然初不殊

秋雨

禾田已熟畏愁霖積潦欲乾泥尚深一雨一涼秋向晚

似安似病老相侵  
人間有盡皆歸物  
世外無生賴有心  
要覓塵埃不到處  
一燈相照夜惺惺

補種牡丹二絕

野草凡花著地生  
洛陽千葉種難成  
姚黃性似天人潔  
糞壤埋根氣不平

換土移根花性安  
猶嫌入伏午陰煩  
清泉翠幄非難辦  
絕色濃香別眼看

曹郎子文赴山陽令

囊空口衆不堪閒却喜平生得細論鶴髮進封償舊德  
彩衣聽訟勉平反楚風剽疾觀新政浙水蕭條詠舊恩  
記取老人臨別語茶瓢霜後早相存

九日三首

九日真佳節年年長賦詩深慙鶴髮老每與菊花期帽  
落無人拾酒狂聊自持豐年餘社壘天意念衰羸

其二

我飲不為酒黃花競此時茱萸謾辟惡麴蘖助和脾淺



酌何勞訴獨醒徒爾為來年我猶健相對亦如斯

其三

河朔今將到山陽近欲行老懷驚聚散一酌慰平生  
陋巷連牆久長淮照眼明到官紛訟牒應憶此時情

遲歸自河

朔節前當至曹郎將赴山陽節后當行

早睡

老人如嬰兒起晏睡常早麤氈薄絮被孤枕自媚好倒  
床作龜息逡巡輒復覺隔門燈火明髣髴聞語笑杯棬

相勸酬往往見譏誚披衣坐跣趺衰老當自了室空窓  
亦虛半夜明月到老盧下種法從古無此妙根生花輒  
開得者自不少要須海底行更問藥山老

廳前柏

穉柏如嬰兒冉冉三尺長移根出澗石植榦對華堂重  
露恣膏沐清風時抑揚我老不耐寒憐汝堪風霜朝夕  
望爾長尺寸常度量知非老人伴可入諸孫行想見十  
年後簷前蔚蒼蒼人來顧汝笑誦我此詩章

十月二十九日雪四首

床頭唧唧糟鳴甕夜半蕭蕭雪打窓  
擁褐旋驚花著樹  
潏醅初喜酒盈缸  
隣翁晨乞米三斗  
釣戶暮留魚一雙  
自笑有無今粗足  
遙憐逐客過重江

時逐客有  
過湖嶺者

龕燈照室久妨睡  
雪氣侵人不隔窓  
枕上詩成那起草  
槽頭酒滴暗鳴缸  
遠來狂客應回去  
高卧幽人未有雙  
猶憶新灘泊船處  
堆蓬積玉撼長江

幽居漫爾存三徑  
燕坐何妨應六窓  
老憶舊書時展卷

病封藥酒旋開缸小園搖落黃花盡古檜飛鳴白鶴雙  
珍重老盧留種子養生不復問王江

鷄子一飛超漲海蜂兒終日透晴窓心空莫著書千卷  
客到長留酒半缸性命早知元有分文章誰信舊無雙  
何年結束尋歸路還看墓廬下飲江

冬日即事

寒日初加一線長臘醅添浸隔羅光新年只願多新酒  
舊疾微令變舊方自昔杯棬元窄小得閒筋力尚康強

買田種秫貧無計自有人家為插秧

近來腹疾頗退足疾尚餘一二醫妻

生言舊所用藥須少增損

### 畫學董生畫山水屏風

承平百事足鴻都無不有築牘試篆隸丹青寫飛走紛  
然四方集狐兔萃林藪何人知有益長嘯呼鷹狗奔逃  
走城邑驚顧念糊口素屏開白雲稱我茅簷陋濡毫願  
揮洒峯巒映巖竇巨石連地軸飛布瀉天漏縈山一徑  
通過水微橋構山家烟火然遠寺晨鐘叩僧從何方來

行速午齋後有客呼渡船隔水惟病叟听然發一笑此  
處定真否人生初偶然與此誰夭壽厄窮妄自憐一醉  
輒日富客至亦茫然邀我沽斗酒

冬至日作

義和飛轡留不住小兒逢節喜欲舞人言老翁似小兒  
烝豚釀酒多為具潁川本自非吾鄉隣里十年成舊故  
誰令閉戶謝往還壽酒獨向兒孫舉飲罷跣趺閉雙目  
寂然自有安心處心安自謂無老少不知鬚髮已如素

似聞錢重薪炭輕今年九九不難數

冬至雪二首

一氣潛萌九地中雪花微落四無風  
初陽便有回天力宿瘴徐看卷地空  
家釀再投猶恨薄官醕多取定無功  
時人淺陋終無益徑就天公借一豐

佳節蕭條陋巷中雪穿窻戶有顏風  
出迎過客知非病歸對先師喜屢空  
黍醞盈瓢終寡味石薪烘灶信奇功  
頗嫌半夜欺毛褐却喜年來麥定豐

讀樂天集戲作五絕

樂天夢得老相從洛下詩流得二雄  
自笑索居朋友絕偶然得句與誰同

樂天得法老凝師後院猶存楊柳枝  
春盡絮飛餘一念我今無累日無思

樂天投老刺杭蘇溪石胎禽載舳艫  
我昔不為二千石四方異物固應無

樂天引洛注池塘畫舫飛橋映綠楊  
潁水隔城來不得



不辭策杖看湖光

樂天種竹自成園我亦牆陰數百竿不共伊家鬪多少  
也能不畏雪霜寒

記病

我病在脾胃一病四十年微傷輒暴下傾注如流泉去  
年醫告我此病猶可痊試取薑豆附三物相和丸服之  
不旬浹病去如醫言醫言藥有毒病已當速捐我意藥  
有功服久功則全侵尋作風痺兩足幾蹢跚徐悟藥過

量醫初固云然舊病則已除柰此新病纏醫言無甚憂  
前藥姑捨旃藥毒久自消真氣從此完鄙夫不信醫私  
智每自賢咄哉已往咎終身此韋弦

除日二首

屠蘇末後不辭飲七十四人今自希筋力明年應更減  
誠心憂世久知非脾寒服藥近方驗風痺經冬勢漸微  
得罪明時歸已晚此生此病任人譏

七十四年明日是三千里外未歸人酒筇泉湧如迎節

詩句雲生喜見春賀客不來知我病鄰家竊語笑吾真  
時人莫作樂天看燕坐端能畢此身

樂天居洛陽日正  
與予年相若非齋

居道場輒携酒尋花遊賞泉石畧無暇日子性  
拙且懶杜門養病已僅十年樂天未必能爾也

## 上元

上元車馬正喧喧老病無聊長掩門不著繁燈眩雙目  
獨邀明月上前軒跼蹐默坐聞三鼓寂寞誰來共一樽  
已覺城中塵土臭急將清雨洗乾坤

壬辰生日兒姪諸孫有詩所言皆過記胸中所懷

亦自作

生日今朝是匆匆又一年讀書真已矣閉目但茫然下  
種言非妄開花果定圓驅羊舊有法視後直須鞭

白鬚

少年不辦求良藥老病無疑生白鬚下種已遲空悵望  
無心猶幸省工夫虛明對面誰知我寵辱當前莫問渠  
自頃閉門今十載此生畢竟得如愚

林筍

竹林遭凍曾枯死春筍連年再發生天與歲寒終倔强  
澤分淇澳轉敷榮狂鞭已逐草侵徑疎影長隨月到楹  
嵇阮欲來從我飲開門一笑亦逢迎

### 西軒種山丹

淮陽千葉花到此三百里城中衆名園裁接比桃李吾  
廬適新成西有數畦地乘秋種山丹得雨生可喜山丹  
非佳花老圃有深意宿根已得土絕品皆可寄明年春  
陽升盈尺爛如綺居然盜天功信矣斯人智根苗相因

依非真亦非偽客來但一笑勿問所從致

遊西湖

閉門不出十年久湖上重遊一夢回行過閣閣爭問訊  
忽逢魚鳥亦驚猜可憐舉目非吾黨誰與開尊共一杯  
歸去無言掩屏卧古人時向夢中來

泛潁水

早歲南遷恨舳艫歸來平地憶江湖半篙春水花千片  
八尺輕船酒一壺徐轉城陰平野闊稍通竹徑小亭孤

前朝宰相終難得父老咨嗟今亦無

自湫溝泛舟至曲水園本文潞公舊

物潞公以遺賈魏公今為賈氏園矣

### 風痺三作

年老百病生風痺已三作主家長患聾說法仍害脚十年學趺坐從此罷雀躍閉目時自觀寸田飽耕鑿下種本無種服藥亦非藥田熟根自生病去如花落吾生默已定有數誰能却數盡吾則行未應墮冥漠

### 新作南門

于公決獄多陰功自知有子當三公高作里門車馬通  
定國精明有父風飲酒一石耳目聰漢家宰相仍侯封  
左右中興始且終我家讀書自我翁恥言法律羞兵戎  
中年出入黃門中智巧不足稱愚忠雖云寡過亦無功  
不忤不求心粗空舉世知我惟天工恃此知不累兒童  
作門不痺亦不隆陋巷正與顏生同勢家笑唾儻見容  
春旱

舊俸存無幾生齒日益多蔽廬雖粗完空廩無麥禾首



種二頃田柰此春旱何誰能持隻雞一酌邢山阿飢寒  
誰相念幸龍未見訶去年投虎頭叩門用干戈邂逅一  
尺雨豈復陰陽和幽明初不隔誠意豈在多惻然上通  
天矧此一盤渦雲興雨隨至父老行且歌

感秋扇

團扇經秋似敗荷丹青髣髴舊松蘿一時用舍非吾事  
舉世炎涼柰爾何漢代誰令收汲黯趙人猶欲用廉頗  
心知懷袖非安處重見秋風愧恨多

樂城三集卷三

欽定四庫全書薈要卷一萬五千七十三

集部

樂城三集卷四

宋 蘇轍 撰

詩十二首

喜姪邁還家

一別匆匆歲五除還家恠我白髭鬚懷中初見孫三世

巷口新成宅一區

姪房添一男孫予亦葺成敝廬皆別後事

林下酒尊還漫

設床頭易傳近看無老年遊宦真安往南北相望結草

廬

次前韻

心空煩惱不須除  
白盡年來罷鑷鬚  
隨俗治生終落落  
苦心憂世漫區區  
居連里巷知安否  
食仰田園問有無  
我已閉門還往絕  
待乘明月過君廬

喜雨

五月十九日夏至

一早經春夏已半  
好雨通宵曉未收  
氣爽暫令多病喜  
來遲未解老農憂  
力耕僅足公家取  
遺秉休違寡婦求  
時向林間數新竹  
籜龍騰上欲迎秋

雨過

東南流注已鳴澗西北霏微僅斂塵人意共懷艱食病  
天公那有不仁人雲移已分貧無福零應方知社有神  
田里相望無一舍終年苦樂會須勻

溽暑

東風吹鼎方然薪遊魚出沒一世入隨湯上下猶欣欣  
不識河漢清涼津十年我已不出門可憐尚寄生死濱  
老知下種功力新開花結子當有辰寒暑一過聊嘖呻

至此有道非有神

外孫文九伏中入村睬麥

春田不雨憂無麥入困得半猶足食伏中一睬不可緩  
旱田蒼耳猶難得人言春旱夏當潦入伏未保天日好  
老農經事言不虛防風防雨如防盜外孫讀書舊有功  
五言七字傳祖風旋投詩筆到田舍知我老來饒且慵  
秋田正急車難起汗滴肩頰愧鄰里磨聲細轉雪花飛  
舉家百口磨牙齒食前方丈我所無烝麤十字或有諸

孫歸何用慰勤苦烹鷄亦有炆胡盧

唐相盧懷慎既老家居諸公嘗往問

疾公設食待客勅庖夫淨去毛勿折其項客喜為當食炆鷄鴨也食至乃炆胡盧耳諸公皆不飽公食之殊美

### 大雨後詠南軒竹二絕句

苦寒壞我千竿綠好雨還催衆筍長痛飲雖無嵇阮客  
瓢尊一試午陰涼

葉開翡翠才通日節竦琅玕不怕風稍放西邊深二丈

端如幽谷茂林中

竹西有二丈隙地筍猶未到

秋後即事

苦熱真疑不復涼  
火流漸見迫西方  
清風一夜吹茅屋  
竹簟今朝避石床  
露濕中庭菊  
含滋水浮西浦稻  
生芒秋成得飽家家事  
莫笑農夫喜欲狂

送遲赴登封丞

昔我過嵩陽  
秋高日重九  
晨邀同行客  
共舉登高酒  
藤籜生胼胝  
一覽河山富  
封壇土消盡  
中夜捫星斗  
下山雙足廢  
欲上知難又  
回首烟雲中  
隱約見巖岫  
未老約



來遊何意七十後吾兒性靜默承邑山路口秋暑山尚  
煩冬雪山方瘦春山利遊觀安輿即迎父

省事

早歲讀書無甚解晚年省事有奇功自許平生初不錯  
人言畢竟兩皆空空中有實何人見實際心知與佛同  
煩惱消除病亦去閉門便了此生中

廣福僧智旂西歸

老人寄東巖蕭然四無隣八尺清冷泉中有白髮人婆

娑弄明月松間夜相賓平生指庚壬終老投此身築室  
潁川市西望長悲辛故山比丘僧留足超我岷歸塗三  
千里秋風入衣巾北嶠百步外我夢一室新速營三間  
堂永奉兩足尊我歸要有時久遠與子親悟老非凡僧  
瓦礫化金銀歸來味玄言見日當自陳

樂城三集卷四

欽定四庫全書薈要卷一萬五千七十四

集部

樂城三集卷五

宋 蘇轍 撰

詩賦銘贊共十首

種藥苗二首

并引

予閒居潁川家貧不能辦肉每夏秋之交菰芥未成  
則盤中索然或教予種薺粟決明以補其匱惜潁川  
諸家多未知此故作種藥苗二詩以告之皆四章章

八句

種甕粟

築室城西中有圖書窓戶之餘松竹扶疎拔棘開畦以  
毓嘉蔬畦夫告予甕粟可儲甕小如甕粟細如粟與麥  
皆種與稌皆熟苗堪春菜實比秋穀研作牛乳烹為佛  
粥老人氣衰飲食無幾食肉不消食菜寡味柳槌石鉢  
煎以蜜水便口利喉調養肺胃三年杜門莫適往還幽  
人衲僧相對忘言飲之一杯失笑欣然我來潁川如遊  
廬山

# 種決明

閒居九年祿不代耕肉食不足藜烝藿羹多求異蔬以  
佐晨烹秋種罌粟春種決明決明明目功見本草食其  
花葉亦去熟惱有能益人矧可以飽三嗅不食笑杜陵  
老老人平生以書為累夜燈照帷未曉而起百骸未病  
兩目告瘁決明雖良何補於是自我知非卷去圖書閉  
目內觀妙見自如聞阿那律無目而視決明何為適口  
乎爾

上巳

春服初成日暖  
潁河漸滿風涼  
欲復孔門故事  
略有童冠  
相將城西百步而近  
杏花半落草香欣然  
願與數子臨水一振衣裳  
故人有酒未酌為我  
班荆舉觴我雖少飲不醉  
未怪遊人若狂  
春風自爾一月花絮極目飛揚  
誦詩相勸行樂良士但取無荒

上巳後

上巳已過旬日  
西湖尚有遊人  
老人復歸閉戶  
戶外百

事日新呼童試問築室春晚何日堂成我家舊廬江上  
隱居三世相因晏子不願改卜我今已愧先君始有苟  
合則止已老姑欲安身西望烝嘗有處傳家圖史常陳  
門中此外何事世故有耳不聞食訖趺坐日晏此心皎  
皎常存萬事汝勿告我婚嫁自畢諸孫

堂成

築室三年堂成可居我初不知諸子勞劬父母老矣風  
雨未除橐裝幾何勿問有無伐木於山因此舊廬不約

不豐燕處無餘堂開六楹南北四筵晝明廓然夜冥黯  
然四鄰無聲布被麤氈身非蚌螺一睡經年夜如何其  
趺坐燕安善惡不思此心自圓東廂靖深以奉嘗忝老  
佛之廬朝香夜燈西廂千卷圖書之林先人所遺子孫  
是承杖屨經行直如引繩顧視而笑此如我心諸子之  
室左右吾背將食擊板一擊而曾瓜畦芋區分布其外  
鉏去瓦礫壤而不塊廢井重浚泉眼仍在轆轤雷鳴甘  
雨時霈園夫能勤家足于菜有客叩門賀我堂成揖客



而笑念我平生三世讀書粗免躬耕明窓脩竹惟我與  
兄蔭映茅茨吐論崢嶸猖狂妄行以得此名老而求安  
匪以為榮

雙柳

我作新堂中庭蕭然雙柳對峙春陽既應千條萬葉風  
濯雨洗如美婦人正立櫛髮髮長至地微風徐來掩冉  
相繆亂而復理垂之為纓綰之為結屈伸如意燕雀翔  
舞蜩蜚嘶鳴不召而至清霜夜落衆葉如剪顏色憔悴

永愧松柏歲寒不改見嘆夫子聊同淵明攀條嘯詠得  
酒徑醉一屨粗給三黜不去亦如展惠

卜居賦

并引

昔予先君以布衣學四方嘗過洛陽愛其山川慨然  
有卜居意而貧不能遂予年將五十與兄子瞻皆仕  
於朝裒橐中之餘將以成就先志而獲罪於時相繼  
出走予初守臨汝不數月而南遷道出潁川顧猶有  
後憂乃留二子居焉曰姑餬口於是既而自筠遷雷

自雷遷循凡七年而歸潁川之西三十里有田二頃而僦廬以居西望故鄉猶數千里勢不能返則又曰姑寓於此居五年築室於城之西稍益買田幾倍其故曰可以止矣蓋卜居於此初非吾意也昔先君相彭眉之間為歸全之宅指其庚壬曰此而兄弟之居也今子瞻不幸已藏於邾山矣予年七十有三異日當追蹈前約然則潁川亦非予居也昔貢少翁為御史大夫年八十一家在瑯琊有一子年十二自憂不

得歸塋元帝哀之許以王命辦護其喪譙允南年七十有二終洛陽家在巴西遺令其子輕棺以歸今予廢棄久矣少翁之寵非所敢望而允南舊事庶幾可得然平昔好道今三十餘年矣老死所未能免而道術之餘此心了然或未隨物淪散然則卜居之地惟所遇可也作卜居賦以示知者

吾將卜居居於何所西望吾鄉山谷重阻兄弟淪喪顧有諸子吾將歸居歸與誰處寄籍潁川築室耕田食粟

飲水若將終焉念我先君昔有遺言父子相從歸安老  
泉閱歲四十松竹森然諸子送我歷井捫天汝不忘我  
我不忘先庶幾百年歸掃故阡我師孔公師其致一亦  
入瞿曇老聃之室此心皎然與物皆寂身則有盡惟心  
不沒所遇而安孰匪吾宅西從吾父東從吾子四方上  
下安有常處老聃有言夫惟不居是以不去

銅雀硯銘

并引

客有遊河朔登銅雀廢臺得其遺瓦以為硯甚堅而

澤歸以遺予為之銘曰

土生萬物而能長存銅雀初成萬瓦雲屯得水而埏得  
火而堅水乾火冷而土不遷石質金聲水火則然臺毀  
棟摧誰使獨全披榛得之如見古人來為吾硯明窓細  
氈老尚著書撫之長嘆用捨有時一愚一賢

壬辰年寫真贊

潁濱遺民布裘葛巾紫綬金章乃過去人誰與丹青畫  
我前身遺我後身一出處皆非吾真燕坐蕭然莫之

與親

管幼安畫贊

并引

予自龍川歸居潁川十有三年杜門幽居無以自適  
稍取舊書閱之將求古人而與之友蓋於三國得一  
人焉曰管幼安蓋幼安少而遭亂渡海居遼東三十  
七年而歸歸於田廬不應朝命年八十有四而沒功  
業不加於人而予獨何取焉取其明於知時而審於  
處已云爾蓋東漢之衰士大夫以風節相尚其立志

行義賢於西漢然時方大亂其出而應世鮮有能自  
全者潁川孫文若以智策輔曹公方其擒呂布斃袁  
紹皆談笑而辦其才與張子房比然至於九錫之議  
卒不能免其身彭城張子布忠亮剛簡事孫氏兄弟  
成江東之業然終以直不見容力爭公孫淵事君臣  
之義幾絕平原華子魚以德量重於曹氏父子致位  
三公然曹公之殺伏后子魚將命至破壁出后而害之  
汝南許文休以人物臧否聞於世晚入蜀依劉璋先



主將克成都文休逾城出降雖卒以為司徒而蜀人  
鄙之此四人者皆一時賢人也然直己者終害其身  
而枉己者終喪其德處亂而能全非幼安而誰與哉  
舊史言幼安雖老不病著白帽布襦袴布裙宅後數  
十步有流水夏暑能策杖臨水盥手足行園囿歲時  
祀其先人絮帽布單衣薦饌饋跪拜成禮予欲使畫  
工以意髣髴畫之昔李公麟善畫有顧陸遺思今公  
麟死久矣恨莫能成吾意者姑為之贊曰

幼安之賢無以過人予獨何以謂賢賢其明於知時審  
於處已以能自全幼安之老歸自東海一畝之宮閉不  
求通白帽布裙舞雩而風四時烝嘗饋奠必躬八十有  
四蟬蛻而終少非漢人老非魏人何以命之天之逸民

樂城三集卷五